

Elements poetics er en ils raquints dad Andri Peer

■ (anr/fa) L'onn 2003 aveva Clà Riatsch publictà in'ediziun cun las poesias dad Andri Peer. Quest onn ha procurà Annetta Ganzoni sco segund tom l'ediziun cun la prosa da l'autur engiadinais. «Andri Peer enconuschan ins en emprima lingua sco poet, ed er el sez resguardava la poesia sco ses emprim chomp d'expressiun litterara», ha declarà *Annetta Ganzoni* sonda a chaschun da la preschentaziun dal cudesch «Andri Peer, Prosa 1945–1985». Prendi part ha era *Bettina Vital* ch'è stada, ensemen cun *Claudia Cathomen*, responsabla per il correctorat da quest cudesch ch'è vegnì edi da la Chasa Editura Rumantscha (CER). «Ma Andri Peer è stà in scriptur versà che ha experimentà en praticamain tut ils

geners litterars, ha cuntinuà Ganzoni. Dapi l'on 1997 è la romanista collavuratura scientifica da l'Archiv svizzer da litteratura e responsabla per il relasch dad Andri Peer. Cun classifitgar tut il material en quest relasch è naschida l'idea d'edir in cudesch cun la prosa da Peer. Auter che tar la poesia ch'el ha scrit be en rumantsch ha'l scrit divers texts da prosa er en tudestg, artitgels en gasetta, feuilletons ed auter pli. «Perquai avain nus integrà en il cudesch era texts tudestgs e fatg in'ediziun bilingua», ha menziunà Ganzoni. En ses raquints ed essays, en satiras, shorts stories e poems en prosa ha tematisà Andri Peer dumondas d'actualitad, ma er interpretà vegls temas retics ed adina puspè scrit sur da l'aventura dal scriver.



Bettina Vital ed Annetta Ganzoni (da san.) han preschentà il cudesch cun la prosa dad Andri Peer.